

提婆菩薩破楞伽經中外道小乘四宗論

元魏三藏法師菩提流支譯

問曰外道所立四宗法非佛法者何者是答
曰謂一異俱不俱 問曰云何言一異俱不
俱答曰有諸外道言一切法一有諸外道言
一切法異有諸外道言一切法俱有諸外道
言一切法不俱是諸外道於虛妄法中各各
執著以爲實有物故 問曰何等外道說一
切法一答曰言一切法一者外道僧佉論師
說言一切法異者外道毗世師論師說言一
切法俱者外道尼捷子論師說言一切法不
俱者外道若提子論師說
問曰云何僧佉人說一切法一答曰僧佉外
道言我覺二法是一何以故二相差別不可
得故 問曰云何二相差別不可得答曰如

牛馬異法二相差別可見可取言此是牛此
是馬而我離覺我不可得離我覺不可得如
我經中說我覺體相如火與熱二法差別不
可得 問曰云何差別不可得答曰彼法不
可說異故譬如白氈不可說言此是白此是
氈二法差別如白氈一切法因果亦如是
問曰云何毗世師外道說一切法異答曰所
言異者我與覺異何以故以說異法 問曰
云何名說異法答曰如說此是白此是氈此
是天德此是天德氈我與覺異亦如是此是
我此是智故 問曰有何差別彼法不可說
一答曰譬如白氈此是白此是氈如是一切
因果各異不可說一故
問曰云何尼乾子說一切法俱答曰言一切
法俱者如我與覺不可說一不可說異復有

異義可說一可說異故 問曰云何不一不異亦一亦異答曰如我與命用相有異方便異故言如貪瞋癡等得言有異譬如燈明得說言一得說言異以有此有彼無此無彼得言一燈異處明異處故得言異如燈明因果白疊一切法亦如是亦得說一亦得說異故言俱也

問曰云何若提子外道說一切法不俱答曰不俱者謂一切法不可說一不可說異以二邊見過故以說一異俱論師等皆有過失故智者不立如是三法 問曰云何過失答曰若離白別無疊者白滅疊亦應滅若異白更有疊者應有疊非白有白非疊是故一異俱等法我俱不立雖然一異俱等一切法不可得言無答此諸外道虛妄分別是邪見相作

是智相皆是不善此義云何又一等法虛妄分別以不得言即彼法彼法一不得言瓶瓶一以瓶即是瓶故亦不得言異法異法一以不得言瓶共疊一以瓶相異疊相異以異法離異法異法不得一不得異以異法不成異法以異法不得言異法若二法說一說異彼二法應說一應說異若不說一不說異者此是虛妄分別若彼二法是一者不得言彼法是異若無二者云何言一以彼法相待成故依世諦虛妄分別第一義諦中無彼外道虛妄分別戲論過故此是總答四種外道邪見之相

自此已下別答四義如是一一觀察迦毗羅優樓伽等外道虛妄分別義不成就此義云何言一切法一者此義不然以滅應滅不滅

不應滅俱滅俱不滅此義云何汝向說我與覺相差別不可得如白麤我破此義何以故以此義不與諸經論相應故汝說諸法差別不可得者此義不然如手爪彼法二相差別不可得故此明何義如爪指掌多之爲手若異此法手不可得如是白麤一不可得何以故無異法故我覺一不可得如是白麤一不可得如手與指掌若此滅者彼亦應滅此義云何若白滅者麤應滅故如截手即截指掌汝意若謂白滅麤不滅者此義不然若麤不滅白亦不應滅如截於手指掌應在如截指掌手亦應在故汝意若謂青黃赤等唯滅白色不滅麤者云何言一若不爾者青黃赤等色不應滅不爾麤不滅者青黃白等色亦不應滅 問曰我青黃赤等覆白色而不滅白

遠大
十一
此義云何答曰麤亦如是覆麤而不滅麤又此義不然洗麤已還見白色故麤亦如是覆麤不滅麤是故白即是麤麤即是白若麤滅者青黃赤白等色云何見若汝意謂白滅覆非滅麤應滅覆麤不應滅白若爾有法滅覆有法不滅不覆云何言一是故一義不成已答外道僧佉論師一切法一竟 問曰迦那陀外道論師言一切法異者我與覺異以說異法故此是我此是覺如白麤法是白此是麤故答曰此義不然以無譬喻故如人說言此是手此是指掌彼人雖說此語不能說異法是故不得言我覺異如白麤以見世間有二種差別故一者相二者處相差別者色香味觸不異相有異相故處差別者如穀豈等有白麤不異相有差別如彼色香

味觸若不爾者有四種過此義云何白滅氎亦滅如彼色香味觸譬如火和合燒瓶成赤色已又爲青色香味亦爾若不爾者色香味觸亦不應滅如彼白氎異不可得若白滅者氎亦應滅氎不滅者白亦不應滅 問曰此義不然依彼法有此法譬如畫壁依壁有畫壁滅畫亦滅畫滅壁不滅譬白滅氎不滅義亦如是答曰汝此譬喻事不相似壁是先有畫是後作而彼白氎起無前後不可得言比白先有氎是後作已答外道衛世師論師一切法異義竟

問曰尼捷子外道論師言一切法俱迦毗羅等論師皆有過失以說一異故是故我說俱而不俱譬如燈明有此有彼有彼有此無此無彼無彼無此如有燈有明有明有燈無燈

無明無明無燈異者能照所照以燈異處明異處是故說異如我覺白氎等亦得說一亦得說異譬如白於氎中別處不可得言此是白此是氎如世間此是牛此是馬等白氎不爾是故我不說異亦不說一若一者白滅氎應滅又若一者亦不應說亦氎黑氎等是故我言得說一得說異此義云何答曰此義不然如向說僧佉毗世師等過失與此無異以何等義僧佉一如向說以何等義毗世師異如向說云何向說如向說言燈明一者燈即是明明即是燈此唯有別數而無別義若爾燈亦應明明亦應燈若此二法一者云何異處如手與指掌無差別腳手有差別手指掌無差別若一者云何言異是故不得言一言異此一異義不成已答外道尼捷子論師一

切法俱竟

問曰若提子論師言僧佉等論師說一切法一異俱皆有過失我若提子不說一切法一異俱如我論中不許此義唯許不俱是故我無僧佉等過失雖然不得說言無不俱此義

遠六

十三

云何答曰此義不然以無譬喻故以無譬喻者我說世諦有如是法第一義諦中無如是相是故此成我所說義此明何義以無彼法即無此法無彼法體亦無此法體以此法不成彼法彼法不成此法以此法畢竟非彼法彼法亦畢竟非此法以白非疊以疊非白以滅不應滅以一者即白是疊疊即是白不爾者滅是滅不滅者不滅若爾云何虛妄分別彼法是一異俱不俱若爾疊亦應非疊非不疊白亦應非白非不白以疊即是疊白即是

白是故疊非疊白非白是故非白不得白如是一異俱不俱皆是虛妄分別唯有言說無有實義如是我覺因果等義亦如是故已答外道若提子論師一切法不俱竟提婆菩薩破楞伽經中外道小乘四宗論